

1.10 YAUHAS NPATITUS

Lukas 3 thiab Yauhas 1

Puag thaum ntxov, ntxov ntxov puag thaum ub, muaj ob tug pojniam, ib tug yog ntxhais, ib tug yog phauj nkawd yeej sib txheeb. Tus ntxhais npe hu ua Malis, tus phauj npe hu ua Elixanpes. Nej puas nco qhov uas tus timtswv los hais rau Malis tias yuav yug ib tug metub thiab tus metub ntawd yog Vajtswv Leejtub ntag. Muaj ib tug timtswv los hais rau Xakhaliyas uas yog Elixanpes tus txiv hais tias nkawd ob niamtxiv yuav yug ib tug tub thiab. Nkawd yuav muab tis npe hu ua “Yauhas Npatitus”

Vajtswv cob ib tes haujlwm tshwjxeeb heev rau Yauhas ua. Nws yog tus qhia kom tej neeg sawvdaws yuav tsum npaj los txais Vajtswv Leejtub Tswv Yexus. Yauhas yuav muab cov neeg uas xav muab kev txhaum tso pov tseg ua kevcai raus dej. Nws yuav muab lawv lub cev raus kiag rau hauv dej thiab rov qab tsa sawv los. Ntawm no yog qhov yamntxwv uas lawv tso kev txhaum tseg thiab pib ua lub neej tshiab. Qhov ntawd zoo ib yam li yug dua tshiab.

Yauhas mus nyob tom roob mojsab qhua. Nws tsis muaj tsev nyob. Nws noj kooj thiab zib ntab. Muaj tej pab neeg coob heev xav tuaj mloog nws qhuab qhia thiab lawv nyiam tej zaj uas nws qhia txog lawv kev ua neej heev. Nws qhia rau lawv txog tej uas yuav tsum muab pub rau lwm tus, tsis hais ris tsho hnav, kev noj haus tibsi. Yauhas tseem qhia rau cov neeg sau se yuav tsum sau ncajnnees thiab txhob sau tshaj tej uas nomtswv kom sau. Thiab qhia rau cov tub rog cia li txaus siab rau lawv tej nyiaj hli.

Lawv txhua tus nug hais tias Yauhas puas yog tus Cawmseej uas lawv tabtom tos. Yauhas teb rau lawv hais tias, “Kuv muab nej ua kevcai raus dej kom ua tau povthawj tias nej twb muab tej kev txhaum tso pov tseg thiab pib ua neej raws tus Tswv qab. Tswv Yexus thiaj yog tus Cawmseej yuav muab nej ua kevcai raus los ntawm Vaj Ntsujplig. Vaj Ntsujplig yog tus yuav los txhawb zog, nws los ntawm Vajtswv los. Nws yuav nrog nraim nej nyob txhua qhov thiab txhua lub sijhawm.” Hnub ntawd muaj neeg coob heev ua kevcai raus dej thiab muab kev txhaum tso tseg. Tswv Yexus thiaj yog tus yuav qhib txojkev los zam txim rau lawv.

Hnub tom qab, Tswv Yexus tuaj ti nkaus ntawm Yauhas xubntiag. Ua rau Yauhas xav tsis thoob. Yauhas qhia rau lawv hais tias “Nej saib! Tus ntawd yog tus uas los ntawm Vajtswv los, yog tus uas peb tabtom tos ntsoov! Nws yuav zam txim rau neeg ntiajteb! Tus ntawd yog tus uas peb tabtom hais txog.”

“Yauhas muab Tswv Yexus ua kevcai raus dej. Tom qab ntawd, Yauhas pom rooj ntug qhib. Nws pom Vaj Ntsujplig – zoo li tus nquab – tabtom ya los tsaws saum Tswv Yexus xubpwg. Tom qab ntawd, nws ho hnov Vajtswv lub suab hais lus saum ntuj tuaj rau Tswv Yexus, “Koj yog kuv tus Tub uas kuv hlub, kuv txaus siab rau koj.”

Hnub tom qab ntxiv, Yauhas tabtom nrog nws ob tus phoojywg ua ke. Lawv puavleej pom Tswv Yexus taug kev tuaj mus. Yauhas taw qhia rau lawv hais tias, “Nej saib! Ntawd yog Vajtswv txojkev cawmdim.” Yauhas ib tug phoojywg npe hu ua Atalis. Atalis dhau mus ua Tswv Yexus ib tug thwjtim lawm thiab.

Tagnrho cov uas hais tag no yog tej uas tshwmsim nyob hauv Yauhas Npatitus lub neej! Yauhas tau ua tej haujlwm uas Vajtswv cob rau nws ua tiav tag.

1.10 YAUHAS NPATITUS – RAU TUS QHIA

Lukas 3 thiab Yauhas 1

Tej tseem ntsiab lus:

- 1) Tus timtswv los xa xov rau Malis hais tias nws yuav xeeb ib tug metub thiab tus Metub ntawd yog Yexus, yog Vajtswv Leejtub. Thiab muaj dua ib tug timtswv los qhia rau Xakhaliyas hais tias koj thiab koj pojniam uas yog Elixanpes yuav muaj ib tug tub thiab muab tis npe hu ua Yauhas Npatitus.
- 2) Yauhas tau ib tes haujlwm tshwjxeeb heev. Nws npaj tej neeg sawvdaws tos lub caij Tswv Yexus los cuag lawv.
- 3) Yauhas qhia kev ua neej rau lawv. Nws qhia hais tias nws muab lawv ua kevcai raus dej. Qhov no ua rau lawv pom lawv tej kev txhaum vim tej uas lawv ua yuam kev thiab muab tej ntawd tso pov tseg.
- 4) Txhua tus los nug Yauhas hais tias koj puas yog Tus Cawmseej los tsis yog. Yauhas hais tias nws tsis yog. Yauhas muab lawv ua kevcai raus dej, tiamsis Tswv Yexus uas yog Tus Cawmseej yuav muab lawv ua kevcai raus los ntawm Vaj Ntsujplig, kom lawv nyob ze Vajtswv.
- 5) Yauhas kuj muab Tswv Yexus ua kevcai raus dej thiab. Nws pom Vaj Ntsujplig nqig los tsaws saum Tswv Yexus subpws zoo ib yam li tus nquab. Nws hnov Vajtswv lub suab hais tias, “Tus no yog Kuv tus Tub uas Kuv hlub. Nws ua rau Kuv zoo siab.”

LUS NUG:

- 1) Xakhaliyas thiab Elixanpes tus tub npe hu li cas?
- 2) Yauhas muaj ib tes haujlwm tshwjxeeb li cas?
- 3) Yog ua cas Yauhas muab tej neeg sawvdaws ua kevcai raus dej?
- 4) Yauhas puas yog tus Cawmseej?
- 5) Tom qab uas Tswv Yexus ua kevcais raus dej tag dabtsi tshwmsim?

LUS TEB:

- 1) Xakhaliyas thiab Elixanpes tus tub yog Yauhas.
- 2) Yauhas tes haujlwm tshwjxeeb yog npaj tej neeg sawvdaws tos lub caij Tswv Yexus los cuag lawv.
- 3) Yauhas muab lawv ua kevcai raus dej kom kom lawv muab kev txhaum tso pov tseg.
- 4) Yauhas tsis yog tus Tus Cawmseej. Tswv Yexus thiaj yog tus Cawmseej.
- 5) Tom qab uas Yauhas muab Tswv Yexus ua kevcai raus dej tag, nws pom Vaj Ntsujplig los tsaws rau Tswv Yexus zoo li tus nquab. Nws tseem hnov Vajtswv lub suab hais tias “Tus no yog Kuv tus Tub uas Kuv hlub. Nws ua rau Kuv zoo siab.”